

Vaughan Gething AC
Y Gweinidog Iechyd a Gwasanaethau Cymdeithasol
Kirsty Williams AC
Y Gweinidog Addysg

12 Rhagfyr 2019

Annwyl Weinidogion

Iechyd emosiynol ac iechyd meddwl plant a phobl ifanc yng Nghymru – y camau nesaf ar gyfer Cadernid Meddwl

Diolch am lythyr y Gweinidog Iechyd a Gwasanaethau Cymdeithasol ar **9 Rhagfyr 2019** yn cadarnhau ei benderfyniad terfynol ynghylch ffocws y Rhaglen Wella Law yn Llaw at Blant a Phobl Ifanc (T4CYPP).

Ein cyfarfod ar 4 Rhagfyr

Yn ein cyfarfod ar 4 Rhagfyr, ystyriwyd eich ymateb ar y cyd ar **22 Hydref 2019** i ganfyddiadau ein gwaith dilynol ar ein hadroddiad Cadernid Meddwl (a gyhoeddwyd ar **8 Awst 2019**). I lywio ein camau nesaf, ystyriwyd hefyd ddadansoddiad manwl o'r wybodaeth rydych wedi'i darparu i'n diweddarau ar gynnydd mewn perthynas â'n hargymhellion gwreiddiol a dilynol. Roeddwn i hefyd yn gallu rhannu fy safbwynt ar y gwaith pwysig sy'n cael ei wneud drwy'r Grŵp Gorchwyl a Gorffen Gweinidogol ar y cyd ar y Dull Ysgol Gyfan lle rwy'n credu bod cynnydd cyson yn cael ei wneud.

Rydym yn cydnabod y gwaith sy'n mynd rhagddo ar draws gwasanaethau i wella'r cymorth ar gyfer plant a phobl ifanc. Fodd bynnag, yn dilyn ein hystyriaeth o'r wybodaeth ddiweddaraf sydd ar gael, rydym yn dal i bryderu bod pellter sylweddol i'w deithio o hyd, yn enwedig mewn perthynas â gwasanaethau iechyd a gofal cymdeithasol.

Fel Pwyllgor rydym wedi datgan yn glir dro ar ôl tro ein bod yn credu bod yn rhaid datblygu dull ysgol gyfan o ymdrin ag iechyd meddwl o ran diwygio ar draws y system. Dyma pam y gwnaethom argymhell, fel rhan o'n gwaith dilynol, y dylai'r Rhaglen T4CYP barhau er mwyn sicrhau ffocws strategol ar draws y sector.



Y camau nesaf ar gyfer y Rhaglen Wella Law yn Llaw at Blant a Phobl Ifanc

Ymhellach i lythyr y Gweinidog Iechyd a Gwasanaethau Cymdeithasol ar 9 Rhagfyr, rydym yn dal i bryderu y bydd y cynigion ar gyfer T4CYPP llawer llai yn gwneud y gwaith o ddiwygio ar draws y system yn anoddach i'w gyflawni. Gyda gwaith pwysig yn parhau i gael ei wneud ar draws y system iechyd a gofal cymdeithasol ehangach, rydym yn credu y gallai hyn achosi ymagwedd dameidiog a allai rwystro'r gwaith goruchwylio a pha mor gyflym y gwneir y gwaith er mwyn gwneud newid ystyriol i'n plant a phobl ifanc.

Nodwn eich bwriad i "sicrhau meithrin cysylltiadau cryf ar draws y system gyfan, a chefnogi'r trosolwg strategol sy'n ofynnol" drwy sicrhau bod y Rhaglen T4CYPP yn adrodd ar gynnydd i'r Grŵp Gorchwyl a Gorffen Cyd-weinidogol ar y Dull Ysgol Gyfan, a Grŵp Cynghori'r Gweinidog ar Ganlyniadau i Blant. Byddem yn ddiolchgar o gael cadarnhad o gwmpas Grŵp Cynghori'r Gweinidog ar Ganlyniadau i Blant o ystyried ei ffocws dealladwy hyd yma ar blant sy'n derbyn gofal. Byddem yn awgrymu ymhellach y dylid ystyried ehangu cwmpas y Grŵp Gorchwyl a Gorffen Cyd-weinidogol i gwmpasu'r newid system gyfan sy'n ofynnol.

Yn sgil eich penderfyniad ynglŷn â dyfodol ffocws y Rhaglen T4CYPP, a'n pryderon ynghylch y risg o ddarnio, ein bwriad yw monitro effaith y newidiadau arfaethedig ar gynnydd traws-sector yn y maes hwn.

Ein camau nesaf fel pwyllgor

Byddwch yn ymwybodol ein bod wedi ymrwymo yn ein hadroddiad gwreiddiol i beidio â chaniatáu i'r mater arwyddocaol hwn gael ei basio, unwaith eto, i bwyllgor olynol gyda chasgliadau ailadroddus o "ragor o waith eto i'w wneud". Yn sgil yr ymrwymiad hwn, rydym yn bwriadu cynnal gweithdy i randdeiliaid ym mis Chwefror 2020 i labelu cynnydd yn erbyn pob un o'n hargymhellion gwreiddiol a dilynol gyda statws coch/oren/gwyrdd. Byddwn hefyd yn defnyddio'r sesiwn honno i nodi beth arall y mae angen i ni bwysu amdano fel Pwyllgor erbyn diwedd y Cynulliad hwn.

Er ein bod yn siomedig na chafodd pob un o'n hargymhellion dilynol ymateb unigol yn eich llythyr ar 22 Hydref, byddem yn hapus i dderbyn rhagor o fanylion – cyn ein sesiwn gyda rhanddeiliaid – er mwyn llywio ein gwaith. Byddem yn falch o gael hynny cyn diwedd mis Ionawr 2020.

Yn olaf, i nodi dwy flynedd ers cyhoeddi ein hadroddiad Cadernid Meddwl ym mis Ebrill 2020, rydym yn bwriadu gofyn am ddadl yn y Cyfarfod Llawn. Yn unol â'n hymrwymiad hirsefydlog i wrando ar leisiau plant a phobl ifanc ym mhopeth a wnawn, rydym hefyd yn bwriadu gwahodd Senedd Ieuenctid Cymru a Grŵp Rhanddeiliaid Ieuenctid Cenedlaethol T4CYPP i gyfrannu at ein gwaith.



Yn gywir

Lynne Neagle

Lynne Neagle AC

Cadeirydd

Copi at: Carol Shillabeer, Cadeirydd, Rhaglen Wella Law yn Llaw at Blant a Phobl Ifanc

